

LA


43

MANIFESTATION
DE
LANTECHRIST
EN LA PERSONNE DE
MAZARIN, ET DE SES ADHERANS.

Avec des figures authentiques de l'Ecriture
Sainte.

*Où est veu à découuert l'impieté & le blasphème des mauuais Chrestiens
de ce Temps, sujet tres remarquable.*

Beatus vir qui non abiit in consilio Mazarinorum & in via Cabalistarum
non stetit, & in cathedra impiorum non sedit. Ps. I.



A PARIS,
Chez la vefue IEAN REMY, rue S. Iacques,
l'Image S. Remy, près le College du Plessis.

M. DC. XLIX.



Case

F. LA MANIFESTATION DE L'ANTECHRIST

39

326

en la personne de MaZarin, & de ses adherans,
avec des figures authentiques de l'Ecriture
Sainte.

1649ma

Où est veu à descouuert l'impieté & le blaspheme
des mauuais Chrestiens de ce temps: sujet tres-
remarquable.

*Beatus vir qui non abiit in consilio MaZarinorum, & in
via Cabalistarum non stetit, & in cathedra impiorum
non sedit. Ps. 1.*



E ne sera pas vn Paradoxe que j'aduan-
ceray, si ie monstre dans ce narré quel
sera le lieu, la naissance, & l'empire de
l'Antechrist: Recit d'autant plus beau
& curieux, qu'il fera voir dans son pro-
grez, aussi bien que dans la fin, vne verité orthodoxe,
mesme auerée par les impies. Mais ce grand Genie
& disert Orateur Romain jadis Ciceron, m'apprend
dans ses Morales, qu'en toutes matieres faut faire
vne exposition du sujet que l'on traite; C'est ce que
j'observeray exactement en toutes mes Opuscles.

Donc pour prelude est à remarquer, que cét ad-
uerbe prepositif entre les Latins scauent qu'il signifie
deuant, qui estant ioinct au substantif suiuant qui
est Christ, porte la signification de celuy qui prece-

derale iugement vniuersel, qui aura des maximes & des Loix opposées à celles de Iesus-Christ, & qui luy sera anterieur, Ce Caliphe de Babilon, ce dragon infernal, n'a aucun nom que celuy de contradiction commun à tous les méchans, qui font leurs œuvres dans les tenebres; haïssans la lumière, par ce que le larron ne veut estre veu: c'est ce qui a obligé la plume d'un ancien à dire, *Qui ambulat noctem, odit lucem*, ces Chats-huans & nocturnes Hyboux qui ne produisent que des actions tyranniques, scandaleuses & sordides, qui oppriment tout le monde par leur iniustice, ce sont les Antechrists, comme ie veux faire voir en la personne de lulle Mazarin & de ses adherans. On peut dire qu'il est pensionnaire des Demons, veu qu'il en conserue les traits, aussi bien que la malice, plus inhumain que Neron, plus cruel qu'Herode, attendu qu'il a plus fait mourir d'innocens, mais ce qui m'estonne plus, est de voir vn homme de très-obscur, basse & vile condition, seruite & mercenaire, commander aux Princes, leur imposer des loix & faire des ordonnances: & pour conuaincre cet ennemy implacable, ie luy diray qu'il abuse en terme de puissance & commet vn equiuoque en Grammaire, vn sophisme en Logique, vn crime de leze-Majesté en Police, & vn blasphemé contre Dieu en matiere de Theologie: sa tyrannie s'oppose à la Charité, son audace, à la modestie; sa superbe, à l'Humilité, son impieté, à la Religion; ses delicateesses, à la sobriété; sa brutalité, à la continence; En vn mot, il surabonde en tout genre de vice, & n'y a crime où il ne soit en-

4

clin, & les plus fortes & violentes passions ne visent qu'à complaire au Demon, auquel il est redevable de sa fortune, aussi bien que de ses infames procédures & inuentions.

Quand est du lieu de la naissance du precurseur de l'Antechrist que j'ay coté, personne ne l'ignore, pour son empire & domination, il est presque par tout, l'Espagnol, sçay quel en est le ioug, l'Italie en reconnoist la perfidie; la France l'a publié pour la tyrannie & ferocité qu'il luy a fait ressentir ce tiltre royal qui a commencé depuis Adam, auquel Dieu dit ayez Seigneurie, remplissez la terre, assuettissez-là; il l'a rendu suspect & le Roy qui est le centre où repose le poid de l'Estat, le Piuot sur lequel tourne la chose publique, & le lien de la société ciuile estant dans la minorité, il a usurpé la verge imperiale, afin de tirer non seulement le reuenu de la Monarchie, mais encore tout le fond, en luy se iustifie le Prouerbe 8. 1. & 30. que là où le serf commandera, le peuple sera ruiné, & vn des estonnemens du Sage est de voir que les fauterelles vont en troupes satisfaisans à leurs desirs sans reprehension.

Il est prohibé aux Actes des Apostres à Tim. 2. à tous soldats de Christ ne se meslerés affaires de cette vie, & que le Cardinal, Euesque ou Prestre n'entreprennent affaires seculieres, autrement qu'il soit déposé; contre cette sainte institution du droit Diuin, Mazarin impose des loix, rait les biens d'Eglises, empesche par son impieté les fonctions Sacerdotales, prophane les choses sacrées, les rend odieuses, fait

5
la guerre à Iesus-Christ iusque dans ses Temples, & par des sacrileges innoüis, fait des actions plus diaboliques qu'humaines, en vn mot dignes de l'Antechrist.

Ces rauages, ces pilleries, ces brigandages, & ces degasts font voir qu'il est fol Pasteur & de neant, qui ne visitera les brebis, ne les cherchera, guerira ny portera, ains mangera la chair, & les depouillera, est adiousté au mesme texte de Zac. 11. que l'épée est sur son bras pour monstrier sa puissance, & la violence de laquelle il vsera, il prononce que son bras sechera & son oeil, sa prudence deuiendra sans rien voir.

Et nostre Seigneur en Saint Math. ayant parlé de la punition de l'Eglise Iudaïque par Antiochus l'illustre que les anciens ont dit auoir esté figure de l'Antechrist: il vient à designer plus spécialement depuis le 23. verset, où il manifeste le faux Christ, en ces termes: *Il battera ses compagnons, surpera leur puissance, & fera toute violence.*

Tout cecy est attribué à Iulle Mazarin, la preuue est euidente, ses excez & iniustices le nottent d'infamie, d'abomination, de crimes & de forfaits: Et partant on ne le prendroit pour la figure & representation, mais pour la realité & verité de la chose representée, qui est ce serpent de Babilone, ce monstre effroyable reuelé par saint Iean, avec plusieurs cornes. Saint Paul le depeint en sorte qu'on ne peut hesiter, parlant du iugement, comme il est cotté au Thessal. 2. dit qu'il ne viendra point que la reuolte ne soit premierement aduenüe, & que l'homme sans loy & le fils

de perdition ne soit reuelé, qui ruinera tout, desolera les familles, soustraira leurs biens, qui semera des divisions, & nourrira la guerre.

De sorte que cette prediction est aduenüe, & accomplie en la personne de Mazarin & de ses sectateurs & Partisans, Monopoleurs, Maltotiers & exauteurs, les Missionnaires, qui maintenant (comme vagabonds) sont errans & epars qui çà qui là rodans comme le Demon qui cherche la proye, mais ils ne sont plus redoutables & leur tyrannie est aneantie par cet illustre Senat, auquel i'ay dedié l'vnion des bons François dans l'ordre d'un Pauegirique qui fera voir à toute la France, qu'elle est appuyée d'une main supreme & auxiliaire plus puissante que celle d'Hercule, plus robuste que celle de Sanson contre les Philistins, aussi Dieu est le protecteur des opprimez & se rend exorable à leurs vœux, tous ces Antechrists sont fugitifs comme des Caïns & retranchez de la société humaine comme excommuniez.

Ces loups que ie corte deguisez en agneaux, qui ont supplanté la vertu, & fait regner les vices, qui ont acquis puissance, credit, autorité, richesses immenses, par felonnie & violence, ils sont de ceux auxquels le Sage en l'Ecclesiastique 12. 4. deffend de donner, fais du bien à l'affligé, ne donne point au cōtempneur de Dieu, garde qu'on ne luy donne à manger, de peur que par ce moyen il vienne à te maistriser, autrement tu recevras des maux au double pour les biens que tu luy auras faits.

Si la pauvreté est la regle de la perfection, & si elle

fait la ioye des bons, la puissance terrienne & opulence feront la gloire des enfans de perdition, c'est à dire Antechrists, qui sont appelez enfans d'orgueil, qui au commencement prennent la forme de l'Agneau, afin d'exercer la puissance du Dragon.

L'Antechrist aura vn esprit de seditieux, de fourbe, d'imposture, d'inuention & d'artifice, opposez aux Disciples de nostre Seigneur qui estoient gens simples, mais celui-cy enchantera les cœurs, les rendra tributaires, vsera d'equiuoques qui seront semblables aux Torches dont la senteur est douce, & la lumiere obscure, mais qui brullera par meschanceté, & ourdira le mistere d'iniquité. Cela ce doit adopter comparatiuement à Iulle qui en a fait le tissu à la veüe de toutes les nations. S. Iean 12.19. disoit bien que de son temps il y auoit plusieurs Antechrists, mais ce n'estoient que ieunes enfans perdus, & non encore esleuez à la parfaite stature de l'homme de peché comme le Sicilien, auquel s'accomplit la Prophetie de S. Gregoire, disant, comme le Cedre croissant en haut laisse au dessous de soy des petits arbres, ainsi en ce temps-là l'Antechrist obtenant temporellent la gloire du monde, surmontera en excellence d'honneur & de puissance la grandeur des autres hommes.

Il ne faut que prendre ce passage au pied de la lettre, pour tirer la substance du sens, ô Dieu iusqu'à quand, ce Vautour abusera-il de la patience des affliges, cét attrape de Sathan, ce dissolu & superbe Tyran, qui est venu comme vn Renard, a regné par cruauté, qui n'aspire qu'au carnage, qu'aux vols & brigandages: mais c'est en ce temps que paroîs-

sent les bons François qui peuuent dire, *in malis temporibus, bona vota seruabimus*. ils ne murmurent point dans le mal qui les presse, ils ne médisent les vns des autres, font voir dans ce temps plus qu'en vn autre vn village constant, leurs volontez sont vnies à celle de Dieu, dans lequel ils esperent que ce Geant qui a roulé son Capitole sur nos Alpes pour echeuer & ruiner l'Estat François, verra bien tost sa fortune bornée dans vn precipice, duquel il ne sortira iamais, à l'imitation des enfans d'Eole, qui ayans esleué leurs pierres, furent d'autant plus précipitées, qu'elles auoient esté exaltées. Il me semble auoir suffisamment prouué par des demonstrations intelligibles fondées dans les sainctes Lettres, que Mazarin & ceux de sa cabale, sont precursseurs del' Antechrist, ces abominations, impietez & deprauations le testifient assez, mais la fin sera d'autant plus deplorable, que ces malefices ont esté extremes.

Et pour conclure ce Paragraphe, ie diray que Iesus a esté tres-pauvre, tres-humble & pacifique, celui-cy est tres-riche, tres-superbe & guerroyant, Iesus a aimé la douceur, la mansuetude & la paix, & Mazarin est impitoyable, & n'aime que la guerre.

Et partant ayans des maximes toutes contraires, il est aisé à inferer & conclure que l'Antechrist nous est représenté par ce fatal Iberien, qui a esté nourry du sang de Meduse, enfanté d'une Vipere, Dieu exhalera son venin pour nostre repos & pour la gloire de son nom, & edification de son Eglise autant souffrante qu'elle est persécutée de cet Apostat & ennemy de la Nature.

FIN.